


Busqueda intenso na cas di Joran van der Sloot pero sin ningun resultado



ORANJESTAD (AAN): Ayeramerdia un biaha mas autoridadnan concerni a sali enbusca di evidencianan pa asina localiza e paradero di e hoben Mericano Natalee Holloway cu ya tin 15 dia sin sa di di dje aki na Aruba. Autoridadnan hunto cu e cachonan special y tambe un persona bisti cu un trahe special na blanco a rondona

e cas di famia van der Sloot pa asina haci un busqueda intenso den e cas aki. Aunke ningun persona kier duna informacion kico exactamente nan a logra haya na e cas aki, nos por a mira cu nan a bay cu dos auto cu tabata staciona dilanti di e cas. E busqueda a dura varios ora caminda na dado

momento mester a pone e sinta pa asina personanan cu no tin nada di haber cu e caso no stroba e investigacion. E pregunta ta di con awor despues di varios dia ta bay busca na e cas aki, ya cu evidencianan quizas por bay perdi? Den oranan di anochi ainda por a mira un helicopter ta bulando ariba e cas aki.

Ben Vocking a habri porta ora cu listramento a start na Montaña



ORANJESTAD (AAN): Te asina leu cu DIARIO por corda, loke a socede Diaranzon mainta pa merdia ta marca e prome biaha den historia cu un Huez, den e caso aki mr. Bob Wit, hunto cu un team investigador consistiendo di Recherche local, oficialnan di FBI, Polis uniform, personal tecnico di polis, mas cacho special di Florida, hunto cu Fiscal

Majoor a drenta den cas di un Huez Comisario.

Esaki pa motibo cu yiu di Huez Comisario ta un di e sospechoso den e caso di desaparicion di e estudiante Natalee Holloway di 18 aña, kende a desaparece luna pasa na Aruba durante un vakantie cortico cu su demas coleganan di school.

Nunca antes a yega di mira, con tanto prensa local y

esnan internacional, a baha manera 'zamuro' den e area di Montaña pa por saca potret of capta riba video digital, loke ta socede.

Manera ta conoci, e team investigador ta enbusca di evidencia relaciona cu e caso di e mucha muher Natalee Holloway, kende pa algun siman caba ta 'spoorloos'. Y na tur e lugarnan cu a worde busca, casnan cu a worde

listra te ainda no por localiza e mucha muher aki pa asina e pesadia cu comunidad ta pasando termina.

Diamars merdia, tabata den area di Fisherman's Hut cu a listra, y aki tambe autoridat te asina leu e informe no a logra di localiza e evidencia cual nan tabata buscando.

E buskeda a sigui ayera ora direpiente a blo na residencia di mr. Paul van der Sloot, kende actualmente ta fungi como Huez Comisario na Corte.

BEN VOCKING A HABRI PORTA

Ora cu autoridat a yega, na porta di e cas di famia Van der Sloot na Montaña, a bin topa cu Ben Vocking, ex-director di Prison di KIA y kende awor ta labora na Ministerio Publico. No ta conoci como kico e tabata presente na e cas na Montaña.

A worde presenta na dje, un orden di Corte cu ta duna OK pa autoridat listra e residencia. Asina un batayon di funcionario kendenan tabata acompaña Huez mr. Bob Wit a drenta.

Huez mr. Wit ta conoci pa

su expresion den un caso na Curaçao na unda el a bisa un acusado "Bo merece un skop na bo Atras". E ta un Huez kende no ta come cuenta pa cual tambe tin un respet grandi pe.

Den e proceso aki, nan a confisca un Hyundai Tucson color blou, modelo 2005. Tambe a confisca un Suzuki Samurai color cora.

Te cu Diaranzon a listra y busca evidencia tanto den cas, pafor den cura, y hasta den e parti pafor di e tereno. Aki a trece e asina yama "Bloodhound" cu a worde treci di Florida, pa asina hole y detecta cualkier presencia di sanger.

FBI DEN TRAHE SPECIAL

Por a nota cu entre otro personal di FBI cu un trahe special color blanco bisti rond di nan curpa, a drenta y yuda autoridat local cu cierto investigacion forensico y cientifico.

Parti pafor tambe, por a mira dado momento con personal di Polis a haya "algo" abao y a cuminsa check esaki.

Sigui lesa Pg 4